

Dermaisiswa LBKM bantu siswa Yale-NUS ikuti program luar negara

► **NUR ADILAH MAHBOB**
adilaham@sph.com.sg

AWAL tahun ini, siswa Kolej Yale-Universiti Nasional Singapura (NUS) Ahmad Musthofa Murdifi berpeluang pergi ke Uganda dan Rwanda bagi mengikuti lawatan belajar.

Lawatan enam minggu itu mencetuskan minatnya terhadap isu seperti konflik antara negara dan undang-undang antarabangsa.

Encik Musthofa, 22 tahun, semalam menerima dermaisiswa Lembaga Biasiswa Kenangan Maulud (LBKM) bernilai \$1,200.

Dermaisiswa itu membolehkannya mengikuti lebih banyak program seperti itu pada masa depan.

“Dermaisiswa ini akan membantu saya membiayai program bukan akademik seperti program ke luar negara.

“Bagi program belajar di Uganda dan Rwanda sebelum ini, perbelanjaannya mencecah sebanyak \$10,000, meskipun sebahagiannya dibiayai sekolah,” ujarnya, yang kini merancang mengikuti program serupa di Kosovo.

Selain dermaisiswa LBKM, beliau menerima Subsidi Yuran Tuisyen Pengajian Tinggi (TTFS) penuh bagi program ijazah undang-undang dan seni liberal di Kolej Yale-NUS itu.

Bekas pelajar Raffles Institution (RI) dan Maktab Rendah Raffles (RJC) itu amat menghargai sokongan masyarakat terhadap pendidikannya, lebih-lebih lagi sejak ayahnya meninggal dunia akibat barah semasa beliau darjah lima.

Ibunya, Cik Nurliza Iksan, kini bertugas sebagai guru agama di Masjid Kampung Siglap demi menyara kehidupan mereka sekeluarga, termasuk Encik Musthofa dan tiga lagi adik yang semuanya masih belajar.

“Keluarga sayalah pendorong utama bagi saya meneruskan pendidikan. Sokongan masyarakat juga banyak membantu keluarga saya,” ujar anak kedua dalam keluarga em-



HARGAI SOKONGAN MASYARAKAT: (Dari kiri) Penerima dermaisiswa LBKM, Encik Ahmad Musthofa Murdifi, bersama Menteri Pendidikan, Encik Ong Ye Kung, dan Presiden LBKM, Encik Suhaimi Salleh, beramah mesra selepas majlis penyampaian dermaisiswa LBKM di Politeknik Singapura (SP) semalam. – Foto BH oleh NUR ADILAH MAHBOB

pat beradik itu ketika ditemui di majlis penyampaian dermaisiswa tahunan LBKM semalam.

Acara yang berlangsung di Pusat Konvensyen Politeknik Singapura (SP) itu dihadiri Menteri Pendidikan Ong Ye Kung sebagai tamu terhormat serta Presiden LBKM Suhaimi Salleh.

Dalam ucapannya, Encik Suhaimi

berkata LBKM menyampaikan dermaisiswa dan biasiswa bernilai lebih \$1.6 juta tahun ini.

Secara keseluruhannya, badan itu sudah memberikan dermaisiswa, biasiswa dan geran kewangan mencecah lebih \$25 juta sejak 1966.

“Selama bertahun-tahun lamanya, kami melihat bilangan penderma dan penaja yang meningkat.

“Ini menunjukkan kami mempunyai sokongan kuat dan tetap daripada masyarakat perniagaan dan orang awam terhadap perjuangan kami membantu pelajar memerlukan untuk mencapai potensi pendidikan mereka,” ujar Encik Suhaimi.

Dengan sektor kebajikan di Singapura menjalani perubahan, LBKM kini giat menyesuaikan diri. Antara lain, mereka memperke-

nal program baru dan menjalankan perubahan digital.

Sebagai sebahagian perubahan itu, LBKM bekerjasama dengan Pusat Sukarelawan dan Dermawan Nasional (NVPC) untuk menguruskan kumpulan relawan yang meningkat.

Badan itu juga menggunakan perisian pengurusan derma Ka-Ching demi membolehkannya mengendalikan derma dengan lebih baik.

Selain itu, LBKM memberi nafas baru kepada laman dan wadah media sosialnya agar mampu mendekati pihak berkepentingan dengan lebih baik.

Badan tersebut pun memperkenalkan program baru, termasuk kerjasama dengan Majlis Ugama Islam Singapura (Muis) tahun ini untuk menawarkan Anugerah Pembelajaran Kerja Sosial Muis.